



OBRAĆANJE GENERALNOG SEKRETARA VIJEĆA ZA REGIONALNU SARADNJU (RCC), g. GORANA SVILANOVIĆA

PETA GODIŠNJICA RCC-a

Panel diskusija:

“PET GODINA VIJEĆA ZA REGIONALNU SARADNJU: GRADIMO NA TEMELJIMA, U SUSRET NOVIM IZAZOVIMA”

Sarajevo, 27.02.2013.

Ekselencije,
Dame i gospodo,
Cijenjeni gosti,

Zadovoljstvo mi je što vam mogu poželjeti dobrodošlicu danas u Sarajevu, da zajedno obilježimo petu godišnjicu Vijeća za regionalnu saradnju (RCC). Vaše prisustvo nas motivira da i ubuduće nastavimo raditi ka novim, uspješnim godišnjicama.

Tokom proteklih pet godina postojanja RCC-a, vidjeli smo važne korake naprijed u povezivanju regiona: zajednički infrastrukturni projekti, stalno povećanje nivoa kulturne razmjene, saradnja u oblastima pravosuđa, unutrašnjih poslova, sigurnosti, obrazovanja, nauke, zdravstva, medija. A svi mi znamo da unaprjeđenje saradnje, ekonomskih i kulturnih veza vodi i ekonomskom rastu.

Vijeće za regionalnu saradnju odigralo je važnu ulogu u ovom procesu, a tako će biti i dalje. Nastavićemo raditi na stvaranju okruženja u kojem ćemo, uz poštivanje međusobnih razlika, moći da vlastite interese prilagodimo interesima naših susjeda, i da profitiramo iz te sinergije. Smatramo da je važno osigurati opću inkluzivnost u svim našim aktivnostima, pokazati da je region u stanju da preuzme odgovornost za vlastitu budućnost i stvori uslove za ukupan napredak u duhu tolerancije i saradnje. Smatramo da je važno njegovati regionalnu stabilnost radi građana u našem regionu i kvaliteta njihovih života. Vjerujemo da ćemo unaprjeđenjem procesa evropskih i evro-atlantskih integracija brže postići taj cilj.

Mnogo toga je postignuto. RCC je postao zborni mjesto za odlučno djelovanje svih uključenih partnera, i evoluirao je u fokusiranog i zrelog aktera, koji uporno promovira i jača regionalnu saradnju.

Htio bih istaknuti nekoliko najvažnijih postignutih rezultata: preuzimanje upravljanja Investicijskim komitetom za jugoistočnu Evropu od Organizacije za ekonomsku saradnju i razvoj (OECD) i njegovo pozicioniranje kao razvojnog motora za strategiju Jugoistočna Evropa 2020 (JIE 2020); uspostavljanje Radne grupe Regionalne inicijative za održiv

energetski razvoj; iniciranje i usvajanje Regionalnog strateškog dokumenta o pravosuđu i unutrašnjim poslovima za 2011.-2013., Akcioni plan za njegovu implementaciju, te mehanizam za praćenje i procjenu kako bi se izmjerio postignuti napredak; stvaranje regionalnog mehanizma saradnje između šefova vojnih obavještajnih službi i šefova nacionalnih organa sigurnosti; izrada Regionalne strategije za istraživanje i razvoj za inovacije na Zapadnom Balkanu i uspostava Radne grupe RCC-a za kulturu i društvo; podrška uspostavi Evropskog udruženja javnih servisa jugoistočne Evrope kao neprofitnog profesionalnog tijela javnih emitera.

Do sada smo uspostavili čvrste temelje, sidro jedne nove vizije, ali moramo gledati naprijed, u budućnost.

Dakle, šta možete očekivati od RCC-a u budućnosti?

Već nekoliko godina, Vijeće za regionalnu saradnju utire put za razvojnu strategiju JIE 2020. Aktivno radimo na njoj od novembra prošle godine, kada su ministri privrede iz regiona usvojili najvažnije ciljeve strategije. Naš osnovni cilj je da unaprijedimo uslove života u našem regionu i vratimo u njegov fokus konkurentnost i razvoj svake zemlje i cijelog regiona. U tom smislu, ovaj se dokument oslanja na strategiju EU *Evropa 2020*.

Nalazimo se usred velike ekonomske i finansijske krize, koja je siromašnima učinila život nemogućim i praktično uništila srednju klasu. Većina nema posao. Oni koji ga imaju, rade za male plate i u stalnom su strahu da ne ostanu bez posla. Strategija JIE 2020 je usmjerena na to da se ova privredna stagnacija i pad preokrenu, potpuno je usmjerena na ekonomski i socijalni rast. Ministri privrede iz regiona su dali zeleno svjetlo za izradu strategije i postavili ciljeve koje žele zajedno da postignu. Mi smo tu da uradimo sve što možemo da oni budu uspješni u ostvarenju tih ciljeva.

Navešću najvažnije: porast zaposlenosti s 40% na 45%; porast međusobne trgovine za 230 procenata, porast BDP-a regiona sa sadašnjih 38 procenata na 46 procenata od prosjeka EU. Da bismo to postigli, mora da se unaprijedi proizvodnja, trgovina, investicije, obrazovanje, i naše domaće vlade moraju da budu znatno efikasnije nego što je to danas slučaj.

Želimo da u procesu regionalne saradnje stvorimo jedan usklađen okvir gdje svi učesnici imaju jasne uloge i odgovornosti u ostvarivanju dogovorenih ciljeva. Zato u izradi strategije, pod okriljem Vijeća za regionalnu saradnju, učestvuju sve relevantne regionalne organizacije, kao što je CEFTA. Naravno, nacionalne institucije imaju ključnu ulogu: ministarstava privrede, obrazovanja, zapošljavanja, zdravlja, pravde, zaštite životne sredine, kulture, relevantne agencije. Podršku će pružiti i međunarodne organizacije, poput EU, OECD, Vijeća Evrope, Svjetske banke. Usvajanje strategije od strane ministara privrede očekuje se u novembru 2013. godine.

Dame i gospodo,

Zemlje regiona su svjesne prednosti regionalne saradnje i neizbježnih i neophodnih veza između njih. Regionalna saradnja i dobrosusjedski odnosi također su sastavni dijelovi Sporazuma o stabilizaciji i pridruživanju EU, koji su potpisale zemlje koje žele postati članice EU. Naravno, kao takva, važan je preduslov za članstvo, što se procjenjuje putem redovnih

izvještaja Evropske komisije o napretku. RCC ima svoju ulogu u pripremi ovih izvještaja, u ocjeni napretka svake pojedine zemlje u procesu pridruživanja.

U tom kontekstu, želimo postići da u EU, prilikom pripreme Instrumenta za pretpristupnu pomoć (IPA) 2, kao ključnog mehanizma pretpristupne finansijske podrške EU, interesi regiona budu maksimalno uvaženi. Želimo da se glas regiona čuje i sluša. RCC će biti konsultovan prilikom donošenja odluka o korištenju ovih fondova na regionalnom nivou. Mislim da je to praktičan način da se održi dinamika evropskih integracija i u isto vrijeme poveća stabilnost regiona. To je i dokaz trajne podrške i opredjeljenja EU ka uključivanju cijelog Balkana, baš kao što je prije tačno deset godina odlučeno u Solunu.

Dragi gosti,

Iskreno sam zahvalan vladama, privatnom sektoru, akademskoj zajednici, civilnom društvu i medijima što nam pomažu da unaprijedimo misiju RCC-a u promoviranju međusobne saradnje i evropskih i evro-atlantskih integracija jugoistočne Evrope, kako bi se inspirisao razvoj u regionu za dobrobit njegovih stanovnika.

Zahvaljujem se svim članovima RCC-a, institucijama EU i međunarodnim partnerima na podršci u omogućavanju da se zvaničnici i stručnjaci iz zemalja regiona sastanu i razgovaraju o temama od zajedničkog interesa i definišu zajedničke ciljeve u pogledu regionalne saradnje, i to u okviru Vijeća za regionalnu saradnju.

Na kraju, zahvaljujem se osoblju Sekretarijata RCC-a na napornom radu, profesionalnom znanju i stručnosti u izvršavanju misije RCC-a.

Nadam se da će tokom mog mandata RCC nastaviti da energično unaprjeđuje saradnju u jugoistočnoj Evropi, i u tome tražim i vašu podršku.

Hvala vam.